

tus ob uxoricidii patratiōem clandestinò loco reposuit, maritum suum licitè transfodere possit? Sunt nonnulli haud inferioris subsellii Moralistæ affirmativam asserentes. Excusari mulierem, quod non ex suspitione, sed certò maritum sibi mortem decrevisse sciverit. Præclusa insuper ipsi omni ad mortis evasionem via præventionis videtur excusare licentiam. Præcipuè quod unicuique id efficere permittat jus naturale, quod urgens alterius nequitia ut medium ad propriæ vitæ conservationem ipsi subministrat necessarium.

XV. At verò nolim ego uxorem maritum eò prætextu interficientem excusabilem judicare. Sive enim sciverit certò uxor institutum Mariti impium, sive ignoraverit, neutro defendenda modo. Dubitanti enim aut suspicanti mariti intentionem uxori non licere talem moliri præventionem apud omnes in confesso est. De sciente certò improbum mariti decretum uxore difficilius ferri potest iudicium. Quicquid sit, adducendus probandi modus tam firmiter insidianti propositum esse, ut pænitere nequeat. Sed illum ambulatoria humanæ voluntatis mutatio vix admissura. Et positâ firmâ illius certitudinis probatione; alia tamen salutis medendi adsunt remedia. Poterit uxor denunciare Magistratui periculum in quo ipsa constituta. Frustranea itaque & iniqua meritò eo respectu iudicanda præventio. Sola necessitas omnia alia excludit medendi remedia. Et quamvis aperiendi propositum Mariti ipsi Magistratui via uxori sit præcisa, nondum tamen effugiendi præclusa ratio. Sed etsi nec fugâ sibi consulere possit, commendare tamen totius rei eventum Deo satius erit. Potest is tanquam κατὰ δύναμιν mutare intentionem mariti. Potest mirabili modo impedire, quò minus propositum deducere in effectum queat maritus. Et huic sententiæ ut calculum addiderim, partim prædictæ me impulerunt rationes. partim subtilissimi Grotii lib. 2. c. 1. n. 5. me movit auctoritas: *Multum falluntur, inquit, & fallunt qui metum qualemcunque ad jus occupandæ interfectionis admittunt.* Et paulò post: *Quod si quis vim non jam præsentem intentet, sed conjurasse & insidiari compertus sit, si venenum struere, si falsam accusationem, falsum testimonium, iniquum iudicium moliri, hunc nego jure posse interfici: si aut aliter*
evadit